

GESCHICHT



— Sag' emol, Abromsche, wat haste befaant fer der alle Paltungche?
— Als ich et hat gehandelt, wor just Niemand ze Haus, as ich hält' können Frage: „Wat lost?“

KARIKATUR AUS DEM „MARIENKALENDER“, 1878, S. 40.

ANTISEMITISMUS

E kopernikaneschen Tournant

Renée Wagener

Zu Ettelbréck ass eng Strooss ëmbenannt ginn. De Grond: Deen, deem seng Memoire joerzéngtelaang doduerch geëiert gouf, datt déi Strooss no him benannt gouf, wor en notoreschen Antisemit.

„Et drängt sech einfach op.“ Dat wor dem Jean-Paul Schaaf, Buergermeeschter vun Ettelbréck, säi Constat an der Sëtzung vum Ettelbrécker Gemengerot vum 26. Abrëll. Domat huet en op eng Proposition vun de Gréngen am Ettelbrécker Gemengerot reagiert, fir d'Montée Monseigneur Fallize, eng kleng Ettelbrécker Strooss, ëmzebennnen. [1]

De Jean-Baptiste Fallize, dee vun 1844 bis 1933 gelieft huet, huet an der Zäit vum Kulturkampf an den Achtzigerjore vum 19. Joerhonnert eng zentral Roll gespillt. Als Geeschtleche wor hien zugläich och Redakter am „Luxemburger Wort“ an Editeur vu kathouleschen Blieder wéi dem „Sonntagsblatt“, dem „Luxemburger Volksblatt“ oder dem „Marienkalender“. An deene véier Blieder gouf ëmmer mol nees iwwer d'„Frechheit der Judenpresse“ oder iwwer den „unverschämten Hochmuth der jüdischen Rasse“ geschriwwen, am „Marienkalender“ goufen zu där Zäit och antisemitische Karikaturen aus däitschen Zeitungen iwwerholl.

Am „Sonntagsblatt“ konnt een och liesen, wéi no Usicht vum Auteur „nach und nach alle Eckhäuser der Stadt Luxemburg in jüdische Hände

übergehen, wie die jüdischen Ausverkäufer den Handel unserer Mitmenschen ruinieren, wie zu Esch Juden, die noch vor wenigen Jahren von Thüre zu Thüre für eine Zwiebel sangen oder mit ‚Bitschelskrepp‘ handelten, heute in Palästen wohnen, wie die Juden volkreiche Ortschaften, wie Ettelbrück und Grevenmacher, vollständig zu überwuchern drohen, wo sie andere kleinere Ortschaften, wie Frisingen, zu ihrer Domäne machen, wie sie fast den ganzen Zwischenhandel auf dem Lande an sich gebracht haben.“ [2] Well de Fallize och direkt déi jiddesch Industriellefamill Godchaux attackéiert hat, kount et 1882 zu engem Prozess, wou d'„Luxemburger Wort“, d'„Volksblatt“ an de „Volksbote“ weinst „übler Nachrede“ respektiv „Verleumdung“ veruerteelt goufen.

„Unverschämter Hochmuth“

Nach 1936 huet de Pierre Grégoire, zanter 1933 Journalist beim „Luxemburger Wort“, an enger Geschicht vun der Zeitung geschriwwen: „Das Jahr 1882 brachte eine längere Auseinandersetzung mit dem Judenproblem. Das ‚Wort‘ schenkte damals dieser Rasse, wenn auch keinen Hass, so doch auch keine sonderliche Liebe. Doch bekämpfte es nicht im mindesten die Rasse als solche, sondern die Exzesse, die sich einzelne Vertreter hatten zuschulden kommen lassen.“ [3] Véierzeg Joer méi spéit, 1974, huet de Grégoire zwar net méi

vun enger jiddescher Rass geschwat, mee gong awer och net op déi fréier Haltung vum „Luxemburger Wort“ an. A sengem Buch „Schriftleiter-Silhouetten“ iwwert déi divers Chefredakteure vun der Zeitung huet hien an enger Undeitung op dee Prozess d'Gebrodder Godchaux beziechent als „Tribu Godchaux“, der an einem Monstre-Prozess gelegen war“. [4]

Am Joer 2017 ass sech den Ettelbrécker Gemengerot awer relativ schnell driwwer eens ginn, datt et net ubruecht wier, dem Fallize nach d'Eier vun enger Stroossebenennung ze loossen. Eng Ëmbenennung wier ëmsou méi néideg, wéi d'Gemeng Ettelbréck wéilt op de Wee goen, fir méi iwwer d'Geschicht vun der jiddescher Communautéit zu Ettelbréck ze sensibiliséieren. Mat der méi oder manner enthusiastescher Ënnerstëtzung vun alle Parteien gouf déi Proposition ugeholl. Dat ass eng bemierkenswäert Decisioun, wat den Ëmgang mat Antisemitismus ugeet, besonnesch deem, dee vu kierchlechen Vertrieeder ausging.

Een Aspekt schéngt mer dobäi besonnesch interessant. Et gouf während der Debat am Ettelbrécker Gemengerot drop higewisen, datt déi Strooss eréischt 1949 nom Fallize benannt gouf. Véier Joer nom Enn vum Zweetem Weltkrich a Shoah gouf et also duerchaus keng Sensibilitéit fir d'Thematik vum Antisemitismus. Dat wor allerdéngs an der Nokrichszäit net spezifesch fir Ettelbréck, an och

net fir Lëtzebuerg. Déi Haltung füügt sech an eng gängeg europäesch Praxis vun der Net-Unerkennung vun der spezifischer Verfolgung vun de jiddeschen Leit duerch den Nazi-Regime an.

Keng Sensibilitéit

Eng Rei Grénn hunn dobäi matgespillt: Nieft Eweckucken, Desintressi oder schlicht Antisemitismus gouf et och d'Haltung, an enger egalitärer Logik keng Affergrupp wëllen ze favorisieren. Mee aus de Quellen ass et oft schwéier erauszulesen, wou dës Logik opgehalen a wou déi vum Ausblenne vun der jiddescher Verfolgung ugefaangen huet. Esou Attitüden dierften och matgespillt hunn, wann zum Beispill d'„Ligue luxembourgeoise des prisonniers et déportés politiques“ 1946 explizit festgehal huet: „[T]oute personne de descendance italienne, ainsi que les israélites sont admis comme membre de la LPPD, s'ils possèdent la nationalité luxembourgeoise et s'ils furent arrêtés pour des motifs de résistance contre l'oppresser.“ Jiddesch Leit, déi virun den Nazie geflücht waren oder déi an d'Konzentrationslager gestach gi waren, waren domat de facto ausgeschlossen, mol ofgesinn dovun, datt de Gros net déi Lëtzebuurger Nationalitéit hat. Déi selwecht Attitude wor um Gesetzesniveau beim Entschiedungsgesetz vun 1950 ze erkennen, wou och d'Helden am Fokus stoungen an net d'Affer vum Nationalsozialismus.

De J.-B. Fallize, e kathoulesche
Kulturkämpfer am 19. Joerhonnert.
Säin Antisemitismus ass laang
Zäit ausgeblend ginn.



QUELL: WIKICOMMONS

Dës Haltung huet sech eréischt ab Enn vun de 1950er-Joere geännert, wou d'jiddesch Communautéit sech zesumme mat anere Veräiner fir d'Rechter vun den Affer vum Nationalsozialismus agesat huet. D'Opféierung och zu Lëtzebuerg vum Anne-Frank-Tagebuch als Theaterstück an där Zäit, den Eichmann-Prozess, wou zwee Judden aus Lëtzebuerg als Zeien opgetruede sinn, d'Mise en Place vun Auschwitz als internationaalt Mahnmal fir d'Affer vum Faschismus dierfte weider Etappen an engem Prozess vun „Entdeckung“ vun der Shoah gewiescht sinn. Dobäi kuum, datt den 2. Vatikanesche Konzil sech fir d'Versöhnung vu chrëschtlecher a jiddescher Relioun ausgeschwat huet.

Eng nei Attitude

Domat ass awer nach net automatesch méi eng kritesch Attitude vis-à-vis vum historiesche Phänomen vum Antisemitismus entstanen. Dat weist d'Aart a Weis, wéi de J.-B. Fallize bis an déi rezent Vergaangenheet an der kathoulescher Gesellschaftsfuerschung duergestallt gouf, nämlech ouni e Bezuch op seng antisemitesch Äusserungen. Et huet zu Lëtzebuerg particulièrement laang gedauert, ier d'Tabuiséierung vun der historiescher Existenz vun antisemitischen Phenomenen an der Lëtzeburger Gesellschaft opgebrach gouf. An et ginn ëmmer nach Beräicher,

wou dat de Fall ass: Zum Beispill gëtt dem Fallize säin Antisemitismus net a sengem Eintrag am Lëtzeburger Autorelexikon ernimmt. Émsou méi muss een d'Positioun vun engem Marcel Kieffer ervirhiewen, dee virun engem knappe Joer an der „Warte“ geschriwwen huet: „Fallize war der Protagonist einer Zeit und eines Welt- und Menschenbildes, für die es heute weder Verständnis noch Toleranz geben kann. Für das damals Geschriebene und mit voller Überzeugung Vertretene muss er sich dem Urteil der Geschichte stellen.“ [5] An émsou méi ass déi unanime Entscheedung vun engem Gemengerot, dee vun engem CSV-LSAP-Koalitioun gefouert gëtt, bemierkenswäert a couragéiert.

Trotzdem stelle sech natierlech Froen. Eitelbréck ass net déi eenzeg Gemeng gewiescht, an där de Fallize duerch e Stroossennumm geëiert gouf. An et gëtt sécher nach weider Lëtzeburger oder auslännesch Perséinlechkeeten, déi sech duerch antisemitesch oder aner mënscheveruechtend Äusserungen ervirgedoen hunn, an no deenen zu Lëtzebuerg Stroosse benannt goufen. Kann een d'Geschicht nees rücht bëien, andeems een déi Eierungen zrëckzitt, déi a fréieren Zäite mol eng Kéier als gutt a richtig empfong goufen? Et gëtt eent, datt mer eis hei am schwielege Feld vun der Symbolpolitik beweegen.

Bei där Symbolpolitik geet et och ëm Muecht iwwer de politeschen

Discours, zu deem den Discours iwwer gesellschaftlech Minoritéiten dozougehéiert. Dem Eitelbrécker Gemengerot seng Decisioun reit sech nämlech an e kopernikaneschen Tournant an, dee mer am Moment zu Lëtzebuerg am Émgang mat der jiddescher Communautéit erliewen. Zënter e puer Joer schéngt och zu Lëtzebuerg - mat vill Retard par Rapport zu eisen Nopeschlänner - en neien Interêt fir jiddesch Geschicht a Patrimoine opzekommen. Eng Rei Facteurs wäerten zu deem Sënnswandel bäigedroen hunn: Zum Beispill datt sech säit Enn vun den 1990er-Joeren méi eng pluralistesche Reliounspolitik entwéckelt huet oder datt et zu ëffentlechen Debatten iwwer d'Shoah zu Lëtzebuerg kuum. Virun allem d'Shoah selwer steet dobäi am Mëttelpunkt, mee donieft entsteet och en neien Interêt um jiddesche Liewen zu Lëtzebuerg virun an nom Zweete Weltkrich. An allen Uertschaften, wou emol jiddesch Communautéiten existéiert hunn, maache sech Leit op d'Sich no de Spueren vun deem Deel vun der Lokalgeschicht, dee laang Joerzénge ausgeklamert wor. Et huet een den Androck, datt et an der Lëtzeburger

Gesellschaft en Nohuelbedarf un Informatioun iwwer dës reliéis Minoritéit zu Lëtzebuerg gëtt, deen sech elo iwwer de Wee vun der Beschäftigung mat der jiddescher Geschicht gedeckt gëtt. Niewelaanscht ass dat net nëmmen en interessante Phänomen vun neiem Interêt un der Micro-Histoire, mee och e Bäitrag zu méi enger diversifizierter Lëtzeburger Gesamtgeschicht.

Quellen:

- [1] <http://ettelbruck.lu/politique/enregistrement-des-seances/seance-du-20-mars-2017/> an <http://ettelbruck.lu/politique/enregistrement-des-seances/seance-du-26-avril-2017/>.
- [2] Der neue König der Juden, in: Luxemburger Sonntagsblatt für Erbauung, Unterhaltung und Belehrung, 10 (14.12.1879) H. 50, S. 407.
- [3] Grégoire, Pierre: Das Luxemburger Wort für Wahrheit und Recht. Die Geschichte einer Zeitung in der Geschichte eines Volkes, Luxemburg 1936, 184.
- [4] Grégoire, Pierre: Schriftleiter-Silhouetten. Luxemburger Wortführer der Wahrheit, Luxemburg 1973, S. 49.
- [5] Kieffer, Marcel: Ein Protagonist seiner Zeit. So gesehen, in: Die Warte, 7.7.2016, S. 11.